

S-DU PAO-LO SIA PEH T'IAH-SAH-LO-NYI-KYÜÔ NYING DI-IH-FONG SHŨ-SING. 使徒保羅寫撥帖撒 羅尼迦人第一封書信

1T. I.

PAO-LO, teng Si-lah, Di-mo-t'a, *mông-mông* T'iah-sah-lo-nyi-kyüô dzæ-ü T'in-Vu Jing-ming teng Cü Yiæ-su Kyi-toh go kyiao-we: Dæn-nyün Jing-ming ah-lah T'in-Vu, teng Cü Yiæ-su Kyi-toh, s-lôh eng-we bing-en peh ng-lah.

保羅，等西拉，提摩太，望望帖撒羅尼迦在於天父神明等主耶穌基督個教會。但願神明阿拉天父，等主耶穌基督，賜落恩惠平安撥爾拉。

² AH-LAH we-leh ng-lah cong-nying z-djông zia-zia Jing-ming, tao-kao li-hyang kyi-nyiaen ng-lah; ³ læ ah-lah T'in-Vu Jing-ming-go min-zin dziang-t'ong kyi-nyiaen ng siang-sing ka læ-go teh-'ang, jing-æ ka læ-go lao-loh, siang-vông ah-lah Cü Yiæ-su Kyi-toh ka læ-go jing-næ: ⁴ ing-we ah-lah hyiao-teh ng-lah, ^[1]ts'ing-æ-go hyüong-di, z Jing-ming sô kæn-shün-go. ⁵ Ing-we ah-lah-go foh-ing djün tao ng-lah u-sen, feh tæ-n-tsih yiu k'eo-dzæ, yia yiu neng-ken, yiu Sing-Ling, yiu toh-jih siang-sing-go bing-kyü: ng yia hyiao-teh ah-lah læ ng-lah cong-nyiang, we-leh ng-go yün-kwu, z dza-go tso-nying. ⁶ Ng læ hyü-to kw'u-næn li-hyang yiu Sing-Ling-go kw'a-lôh tsih-ziu keh-go dao-li, we k'en ah-lah-go yiang, yia we k'en Cü-go yiang; ⁷ z-ka tso Mô-gyi-teng Üô-kæ-üô cong siang-sing cü-kwu-go pông-yiang.

² 阿拉爲了爾拉衆人時常謝謝神明，禱告裏向記念爾拉；³ 來阿拉天父神明個面前長通記念爾相信介來個德行，仁愛介來個勞碌，想望阿拉主耶穌基督介來個忍耐。⁴ 因爲阿拉曉得爾拉，親愛個兄弟，是神明所揀選個^[1]。⁵ 因爲阿拉個福音傳到爾拉烏碎，弗單只有口才，也有能幹，有聖靈，有篤實相信個憑據。爾也曉得阿拉來爾拉中央，爲了爾個緣故，是咋個做人。⁶ 爾來許多苦難裏向有聖靈個快樂接受箇個道理，會看阿拉個樣，也會看主個樣；⁷ 是介做馬其頓亞該亞衆相信主顧個榜樣。

[1] 'Ôh wô, Jing-ming sô ts'ing-æ-go hyüong-di, z mong kæn-shün-go. 或話，神明所親愛個兄弟，是蒙揀選個。（原註）

⁸ Ing-we Cü-go dao-li yi-kying dzong ng-lah ka yiang-k'æ, feh tæ-n-tsih læ Mô-gyi-teng Üô-kæ-üô di-fông, ziu-z kôh-tao-c'ü tu t'ing-meng ng siang-sing Jing-

ming go ming-sing; sô-yi ah-lah ih-kyü tu hao-vong kông.⁹ Gyi-lah zi læ-tih kông ah-lah ky'i-ts'u we-djôh ng go z-ken z dza-go, wô ng-lah z dza-go ky'i-diao ngeo-ziang kwe-vu Jing-ming, ky'i voh-z keh-we weh-go Tsing-Jing;¹⁰ yi næ-sing teng-dæ Gyi Ng-ts dzong t'in kông-lôh-læ, ziu-z yi-kying peh Gyi dzong si-nying li-hyang weh-cün-læ go Yiæ-su, we kyi ah-lah min-diao tsiang-læ ô-wông go.

⁸ 因為主個道理已經從爾拉介揚開，弗單只來馬其頓亞該亞地方，就是各到處都聽聞爾相信神明個名聲；所以阿拉一句都好留講。⁹ 其拉自來的講阿拉起初會着爾個事幹是咋個，話爾拉是咋個棄掉偶像歸附神明，去服侍箇位活個真神；¹⁰ 又耐心等待其兒子從天降落來，就是已經撥其從死人裏向活轉來個耶穌，會救阿拉免掉將來慳惶個。

1T. II.

HYÜONG-DI, ng-lah zi hyiao-teh, ah-lah ky'i-ts'u we-djôh ng feh-z vu-ih-ts-kyü: ah-lah læ Fi-lih-pi se-tsih yü-sin ziu nying-kô ky'üih-'æ, be nying-kô tsao-t'ah, (keh z ng-lah hyiao-teh-go,) dæn-z læ hyü-to ts'ao-ziao cong-nyiang we dzæ-ü ah-lah-go Jing-ming fông-tæn djün Jing-ming-go foh-ing peh ng-lah.

兄弟，爾拉自曉得，阿拉起初會着爾弗是無益之舉。阿拉來腓立比雖即預先受人家屈害，被人家糟蹋，（箇是爾拉曉得個，）但是來許多吵擾中央會在於阿拉個神明放膽傳神明個福音撥爾拉。

³ Ing-we ah-lah-go ky'ün-hwô bing m-neh ts'ôh-ngwu, bing m-neh wë-u, bing m-neh kæn-tsô: ⁴ tsing-ziang be Jing-ming s-ko pô foh-ing t'ôh-fu ah-lah, ah-lah z-ka kông; feh-z iao peh nying hwun-hyi, z iao peh keh-we s ah-lah sing go Jing-ming hwun-hyi. ⁵ Ah-lah dzong m-neh yüong vong-dzing-go shih-wô, z ng-lah sô hyiao-teh-go; yia m-yiu t'en-sing ing-dzông-tih, Jing-ming hao tso te-tsing: ⁶ bing m-neh læ ng-go u-sen, 'ôh-tsia bih-nying u-sen, siang nying-go ts'ing-tsæn; (ah-lah tso Kyi-toh-go s-du, nyün k'o-yi [¹]gæ-djôh ng-lah:) ⁷ fæn-cün z 'o-'o-ky'i-ky'i læ ng-lah cong-nyiang, ziang ah-nyiang fu-kiang zi-go na-hwun ka. ⁸ Z-ka, ah-lah ts'ih-sing ky'i-mo ng, fi-dæn hwun-hyi pô Jing-ming-go foh-ing coh peh ng, ziu-z sô-c'ih zi-go sing-ming tu k'eng-go; ing-we ng z ah-lah sô æ-sih-go.

³ 因為阿拉個勸化並無得錯誤，並無得穢污，並無得奸詐。⁴ 正像被神明試過把福音託付阿拉，阿拉是介講；弗是要撥人歡喜，是要撥箇位試阿拉心個神明歡喜。⁵ 阿拉從無得用奉承個說話，是爾拉所曉得個；也無有貪心隱藏的，神

明好做對證。⁶ 並嘸得來爾個烏碎，或者別人烏碎，想人個稱讚；（阿拉做基督個使徒，原可以戲着爾拉^[1]。）⁷ 反轉是和和氣氣來爾拉中央，像阿孃撫養自個奶花介。⁸ 是介，阿拉切身企慕爾，非但歡喜把神明個福音給撥爾，就是捨出自個性命都肯個；因為爾是阿拉所愛惜個。

[1] 'Ôh wô, p'o-fi ng-lah; 'ôh, yiu t'i-min. Yiu-teh fæn cing-ah ng-lah. 或話，破費爾拉；或，有體面。有得翻鎮壓爾拉。（原註）

⁹ Hyüong-di, ah-lah-go lao-loh sing-kw'u ng kyi-teh-go: djün Jing-ming-go foh-ing peh ng, i-pin nyih-yia tso sang-weh, s-teh ah-lah feh we p'o-fi ng-lah li-hyang soh-go nying. ¹⁰ Ng hao tso te-tsing, Jing-ming yia hao tso te-tsing, ah-lah dæ ng siang-sing-go cü-kwu z dza-go ts'ing-kyih, dza-go tsing-dzih, m-kaoh hao p'i-bing. ¹¹ Ng yia hyiao-teh ah-lah z dza-nyiang ky'ün-hwô, en-ŵe, ting-coh ng-lah kôh-nying, tsing-ziang ah-tia teng zi-go ng-nô ka; ¹² iao s-teh ng-lah-go 'ang-we neng-keo 'eh-djôh Jing-ming-go *sing-siang*: Gyi z dziao ng-lah læ, hao tseo-tsing Gyi-go koh-kô, teh-djôh Gyi-go yüong-wô.

⁹ 兄弟，阿拉個勞碌辛苦爾記得個。傳神明個福音撥爾，依邊日夜做生活，使得阿拉弗會破費爾拉裏向啥個人。¹⁰ 爾好做對證，神明也好做對證，阿拉代爾相信個主顧是咋個清潔，咋個正直，嘸告好批評。¹¹ 爾也曉得阿拉是咋樣勸化，安慰，叮囑爾拉各人，正像阿爹等自個兒因介；¹² 要使得爾拉個行為能夠合着神明個心想。其是召爾拉來，好走進其個國家，得着其個榮華。

¹³ Sô-yi ah-lah yia dziang-t'ong zia-zia Jing-ming, ing-we ng dzong ah-lah k'eo-li t'ing-meng sô djün *peh ng-lah* Jing-ming-go dao-li, ziu tsih-ziu gyi; feh sön z nying-go dao-li, z *Jing-ming-go dao-li*; keh tsing-tsing z Jing-ming-go dao-li; gyi yia z ken-dong ng-lah siang-sing cü-kwu-go sing. ¹⁴ Hyüong-di, keh-sing Yiu-t'a koh li-hyang dzæ-ü Kyi-toh Yiæ-su tso Jing-ming-go kyiao-we, ng-lah z 'ôh gyi-go yang: ing-we ng-lah læ peng-koh-nying siu-li ky'üoh-kw'u, ziang gyi-lah læ Yiu-t'a nying siu-li ih-ying. ¹⁵ Keh-sing Yiu-t'a nying z long-sah Cü Yiæ-su teng zi-go sin-cü-nying, yi ky'ü-djoh ah-lah; z m-neh peh Jing-ming hwun-hyi, yi z teng cong-nying tsôh-te-go; ¹⁶ feh hyü ah-lah kông *dao-li* peh bih-koh-nying, hao peh gyi-lah teh-kyiu: gyi z-ka djông-djông ôh-kwun mun-ying. Dæn-z ô-wông tao gyih-deo z yi-kying ling-djôh gyi.

¹³ 所以阿拉也長通謝謝神明，因為爾從阿拉口裏聽聞所傳撥爾拉神明個道理，就接受其；弗算是人個道理，是神明個道理；箇真真是神明個道理；其也是感動爾拉相信主顧個心。¹⁴ 兄弟，箇星猶太國裏向在於基督耶穌做神明個教會，爾拉是學其個樣。因為爾拉來本國人手裏喫苦，像其拉來猶太人手裏一

樣。¹⁵ 箇星猶太人是弄煞主耶穌等自個先知人，又驅逐阿拉；是無得撥神明歡喜，又是等衆人作對個；¹⁶ 弗許阿拉講道理撥別國人，好撥其拉得救。其是介常常惡貫滿盈。但是慚惶到極頭是已經臨着其。

¹⁷ HYÜONG-DI, ah-lah dzæn-z teng ng ts'ah-k'æ, (*peh-ko z nga-min-go kyi-sing, feh-z li-deo-go sing,*) ziu keng-kô ts'ih-sing iao teng ng-lah we-min. ¹⁸ Sô-yi ah-lah siang tao ng-go u-sen læ; (ngô Pao-lo feh-ts ih-tsao, yiu liang-tsao *iao-siang læ;*) tsih-z Sah-dæn tsu-djü ah-lah. ¹⁹ Ing-we ah-lah-go siang-vông, teng kw'a-lôh, teng kao-hying ta-go kwun-min, z soh-si ni? Tao ah-lah Cü Yiæ-su Kyi-toh læ-go z-'eo, læ Gyi-go min-zin, ky'i feh-z ng-lah ma? ²⁰ Ng-lah tsing-tsing z ah-lah-go yüong-wô teng kw'a-lôh.

¹⁷ 兄弟，阿拉暫時等爾拆開，（不過是外面個肌身，弗是裏頭個心，）就更加切身要等爾拉會面。¹⁸ 所以阿拉想到爾個烏碎來；（我保羅弗止一遭，有兩遭要想來；）只是撒但阻住阿拉。¹⁹ 因爲阿拉個想望，等快樂，等高興戴個冠冕，是啥西呢？到阿拉主耶穌基督來個時候，來其個面前，豈弗是爾拉嗎？²⁰ 爾拉真真是阿拉個榮華等快樂。

1T. III.

Sô-yi ah-lah tsæ jing-næ-feh-djü, dzing-nyün doh-zi deng-lôh læ Yüô-tin di-fông; ² ziu ts'a ah-lah hyüong-di Di-mo-t'a, z Jing-ming-go ts'a-s, ah-lah djün Kyi-toh foh-ing go pông-siu, ky'i kyin-kwu ng-lah, ky'ün ng-lah yü-kô dzeng siang-sing-go sing, ³ sæn-leh yiu nying we-leh keh-sing kw'u-næn sing-li yiao-dong: ng-zi hyiao-teh ah-lah z we-leh ka shih-lih-tong. ⁴ Ing-we ah-lah teng ng dô-kô læ-tong z-'eo z yü-sin teng ng wô, ah-lah pih iao tsao-djôh wæn-næn; 'eo-deo ko-jün z ka, yia z ng-lah hyiao-teh-go. ⁵ Sô-yi ngô tsæ jing-næ-feh-djü, ziu ts'a nying ky'i tang-t'ing ng-lah siang-sing-go sing; k'ong-p'ô keh s-s-go cü-kwu yi-kying s-s ng-lah, ah-lah-go lao-loh ziu lôh-k'ong-de.

所以阿拉再忍耐弗住，情願獨自庖落來雅典地方；² 就差阿拉兄弟提摩太，是神明個差使，阿拉傳基督福音個幫手，去堅固爾拉，勸爾拉愈加存相信個心，³ 省勒有人爲了箇星苦難心裏搖動。爾自曉得阿拉是爲了介設立東。⁴ 因爲阿拉等爾大家來東時候是預先等爾話，阿拉必要遭着患難；後頭果然是介，也是爾拉曉得個。⁵ 所以我再忍耐弗住，就差人去打聽爾拉相信個心；恐怕箇試試個主顧已經試試爾拉，阿拉個勞碌就落空了。

⁶ Næn-kæn Di-mo-t'a dzong ng keh-deo kyü-læ, t'ong-cü ah-lah hao sing-sih, kông ng-lah siang-sing-go sing teng jing-æ, ping-ts'ia djông-djông ts'ih-sing kyinyiæn ah-lah, k'eh-siang iao kyin ah-lah, ziang ah-lah yia *iao kyin* ng-lah ka; ⁷ hyüong-di, ah-lah sô-yi we-leh ng-go z-ken, t'ing-meng ng-go siang-sing, læ ah-lah ih-ts'ih wæn-næn kying-kyih cong-nyiang *sing-li* teh-djôh en-ŵe. ⁸ Ing-we ng-lah dzæ-ü Cü neng-keo lih-leh-lao, ah-lah ziu yiu sing-ming de. ⁹ Ah-lah we-leh ng-go z-ken læ ah-lah Jing-ming min-zin sô yiu ih-ts'ih-go kw'a-lôh, dza neng-keo coh-zia Jing-ming pao-dzing Gyi-go eng-we ni? ¹⁰ *ah-lah* nyih-yia kah-nga hyüih-sing gyi-tao, iao-siang kyin ng-go min, hao pu-tsoh ng siang-sing-go ky'üih-siao.

⁶ 難間提摩太從爾箇頭歸來，通知阿拉好信息，講爾拉相信個心等仁愛，並且常常切身記念阿拉，渴想要見阿拉，像阿拉也要見爾拉介；⁷ 兄弟，阿拉所以爲了爾個事幹，聽聞爾個相信，來阿拉一切患難緊急中央心裏得着安慰。⁸ 因爲爾拉在於主能夠立勒牢，阿拉就有性命了。⁹ 阿拉爲了爾個事幹來阿拉神明面前所有一切個快樂，咋能夠祝謝神明報盡其個恩惠呢？¹⁰ 阿拉日夜格外血心祈禱，要想見爾個面，好補足爾相信個缺少。

¹¹ Dæn-nyün keh-we Jing-ming ah-lah *T'in-Vu* teng ah-lah Cü Yiæ-su Kyi-toh ying-dao ah-lah-go lu, hao ih-dzih tao ng-go u-sen læ. ¹² Dæn-nyün Cü kô-ts'eo ng-go jing-æ, peh "ng-lah we yü-kô siang-æ, yü-kô æ-sih cong-nying, ziang ah-lah æ-sih ng-lah ih-ying; ¹³ s-teh Gyi we kyin-kwu ng-lah-go sing, læ Jing-ming ah-lah *T'in-Vu*-go min-zin neng-keo sing-jün m-p'i-bing; ih-dzih tao ah-lah Cü Yiæ-su Kyi-toh teng Gyi cong sing-du læ-go z'eo.

¹¹ 但願箇位神明阿拉天父等阿拉主耶穌基督引導阿拉個路，好一直到爾個烏碎來。¹² 但願主加湊爾個仁愛，撥「爾拉會愈加相愛，愈加愛惜衆人，像阿拉愛惜爾拉一樣；¹³ 使得其會堅固爾拉個心，來神明阿拉天父個面前能夠聖善嘸批評；一直到阿拉主耶穌基督等其衆聖徒來個時候。

1T. IV.

HYÜONG-DI, tsong-r-yin-ts, ng-lah kyijün tsih-ziu ah-lah-go kao-hyüing kæ dza-go tso-nying hao peh Jing-ming hwun-hyi, næn-kæn ah-lah dzæ-ü Cü Yiæ-su ^[1]siang-ts'ing ng, ky'ün-ky'ün ng, yüong yü-kô hyüih-sing ka ky'i tso. ² Ng-lah hyiao-teh ah-lah k'ao-djôh Cü Yiæ-su z dza-go ting-coh ng. ³ Jing-ming-go ts-i ziu-z iao s-teh ng-lah sing-jün, iao ng-lah feh tsao-djôh kæn-ying z-ken; ⁴ iao kôh-

nying hyiao-teh pao-siu zi-go ky'i-ming we sing-jün, yiu t'i-min; ⁵ feh-k'o dong yüôh-sing, ziang feh hyiao-teh Jing-ming go bih-koh-nying ka. ⁶ Kông-tao keh-go z-ken, feh iao ng-lah tang-mo ǵe-ky'üoh ng-go hyüong-di: ing-we Cü pih iao sing-ün bæn keh-sing ih-ts'ih-go z-ken, ziang ah-lah zin-deo wô hyiang ng dao, ts'ih-sing tso te-tsing go. ⁷ Jing-ming dziao ah-lah læ, feh-z iao ah-lah ǵe-u, z iao ah-lah sing-jün. ⁸ Sô-yi ^[2]ky'i-diao-go cü-kwu, feh-z ky'i-diao nying, z ky'i-diao Jing-ming; Gyi z pô Gyi-zi Sing-jün-go Ling s-peh ah-lah go.

兄弟，總而言之，爾拉既然接受阿拉個教訓該咋個做人好撥神明歡喜，難間阿拉在於主耶穌相請^[1]爾，勸勸爾，用愈加血心介去做。² 爾拉曉得阿拉靠着主耶穌是咋個叮囑爾。³ 神明個旨意就是要使得爾拉聖善，要爾拉弗遭着姦淫事幹；⁴ 要各人曉得保守自個器皿爲聖善，有體面；⁵ 弗可動慾心，像弗曉得神明個別國人介。⁶ 講到箇個事幹，弗要爾拉打摹委曲爾個兄弟。因爲主必要伸冤辦箇星一切個事幹，像阿拉前頭話向爾道，切身做對證個。⁷ 神明召阿拉來，弗是要阿拉穢污，是要阿拉聖善。⁸ 所以棄掉個^[2]主顧，弗是棄掉人，是棄掉神明；其是把其自聖善個靈賜撥阿拉個。

[1] 'Ôh wô, gyiu-k'eng. 或話，求懇。（原註）

[2] 'Ôh wô, k'en-ky'ing-go; 'ôh, we-nyih-go. 或話，看輕個；或，違逆個。（原註）

⁹ Kông-tao ts'ing-æ hyüong-di z-ken, ng-lah hao-vong ngô sia sing ky'ün ng; ing-we ng-zi mong Jing-ming-go kao-hyüing neng-keo dô-kô siang-æ: ¹⁰ ng-lah yia æ-sih 'en Mô-gyi-teng-go cong hyüong-di. Næn-kæn ah-lah ky'ün ng-lah, hyüong-di, iao kah-nga yü-kô dzeng jing-æ-go sing, ¹¹ ih-sing tang-sön hao en-en-zing-zing tso-nying, kôh-nying kwu-djôh zi-go z-ken, ts'ing-siu tso sang-weh, ziang ah-lah yi-kying ting-coh ng-lah go: ¹² z-ka dziu kyiao-nga-nying k'en-læ ng-lah tso-nying z jing-kwe-dao-kyü, ng-zi yia ih-ngæn ^[1]ve ky'üih-siao-dziang-tön.

⁹ 講到親愛兄弟事幹，爾拉好留我寫信勸爾；因爲爾自蒙神明個教訓能夠大家相愛。¹⁰ 爾拉也愛惜咸馬其頓個衆兄弟。難間阿拉勸爾拉，兄弟，要格外愈加存仁愛個心，¹¹ 一心打算好安安靜靜做人，各人顧着自個事幹，親手做生活，像阿拉已經叮囑爾拉個。¹² 是介就教外人看來爾拉做人是循規蹈矩，爾自也一眼艱缺少長短^[1]。

[1] 'Ôh wô, feh we gæ-djôh nying-kô. 或話，弗會戳着人家。（原註）

¹³ Hyüong-di, kông-tao yi-kying kw'eng-joh-go cü-kwu, ngô feh iao ng-lah feh ming-bah; sæn-leh ng tæen iu-meng, ziang bih-nying ka, gyi z 'ao-vu siang-deo go. ¹⁴ Ah-lah ziah-z siang-sing Yiæ-su si-ts tsæ weh-cün-læ, z-ka keh-sing k'ao-djôh Yiæ-su kw'eng-joh-go cü-kwu, Jing-ming we pô gyi-lah teng Yiæ-su dô-kô ta-leh-

læ. ¹⁵ Ah-lah vong Cü-go ming wô hyiang ng dao: Tao-leh Cü læ-go z-'eo ah-lah wa dzing-lôh-tong-go weh-nying tsæ-ve sin-jü keh-sing kw'eng-joh-go cü-kwu. ¹⁶ Ing-we Cü tsiang-læ fah-c'ih *hyiang-hyiang* 'ao-ling, yüong t'in-s-tsiang-go sing-hyiang, teng Jing-ming-go 'ao-dong, Gyi-zi dzong t'in kông-lôh-læ; keh-sing dzæ-ü Kyi-toh go si-nying ziu we sin bô-ky'i; ¹⁷ 'eo-deo we ta ah-lah dzing-lôh-tong-go weh-nying teng gyi-lah dô-kô dzing-leh yüing sing-zông k'ong-cong ky'i nying-tsih Cü; z-ka ah-lah we djông-djông teng Cü deo læ-tong. ¹⁸ Ka-ni, hao yüong keh-fæn shih-wô dô-kô siang ^[1]en-ŵe.

¹³ 兄弟，講到已經睏熟個主顧，我弗要爾拉弗明白；省勒爾擔憂悶，像別人介，其是毫無想頭個。¹⁴ 阿拉若是相信耶穌死仔再活轉來，是介箇星靠着耶穌睏熟個主顧，神明會把其拉等耶穌大家帶勒來。¹⁵ 阿拉奉主個名話向爾道。到了主來個時候阿拉還剩落東個活人再膾先如箇星睏熟個主顧。¹⁶ 因爲主將來發出響響號令，用天使長個聲響，等神明個號筒，其自從天降落來；箇星在於基督個死人就會先爬起；¹⁷ 後頭會帶阿拉剩落東個活人等其拉大家乘勒雲升上空中去迎接主；是介阿拉會常常等主頭來東。¹⁸ 介呢，好用箇番說話大家相安慰^[1]。

[1] 'Ôh wô, ky'ün. 或話，勸。（原註）

1T. V.

Dæn-z kông-tao nyih-ts teng z-'eo, ng-lah hyüong-di hao-vong *ngô* sia sing peh ng. ² Ing-we ng-zi ming-ming hyiao-teh Cü-go nyih-ts iao ziang yia-li-go zeh ka læ. ³ Gyi-lah wô z t'a-bing en-tæn z-'eo, 'o-se ziu we deh-jün ling-djôh gyi, ziang du-t'ong *ling-djôh* shông-sing-go lao-nyüing ka; gyi-lah tsong dao-feh-ko.

但是講到日子等時候，爾拉兄弟好留我寫信撥爾。² 因爲爾自明明曉得主個日子要像夜裏個賊介來。³ 其拉話是太平安耽時候，禍祟就會突然臨着其，像肚痛臨着雙身個老嫗介；其拉總逃弗過。

⁴ Hyüong-di, ng-lah feh-z *deng* læ heh-en li-hyiang go, s-teh keh-go nyih-ts ziang zeh ka væn-djôh ng-lah. ⁵ Ng-lah tu z kwông-ming nyih-li-go nying: ah-lah bing feh-z yia-li heh-en-go *nying*. ⁶ Sô-yi ah-lah feh kæ ziang bih-nying ka kw'eng-joh; z iao su-sing, kying-jing. ⁷ Kw'eng-joh-go cü-kwu z yia-tao kw'eng-go; ky'üoh-tse-go cü-kwu z yia-tao ky'üoh-go: ⁸ dæn-z ah-lah tso nyih-li-go nying kæ kying-jing; c'ün-zông siang-sing teng jing-æ tông wu-sing-kying, wa-yiu siang-vông teh-

kyiu go sing tông t'ih-mao. ⁹ Ing-we Jing-ming feh-z shih-lih ah-lah ziu ô-wông; z shih-lih *ah-lah* k'ao-djôh ah-lah Cü Yiæ-su Kyi-toh hao teh-kyiu: ¹⁰ Gyi z we-leh ah-lah si, s-teh ah-lah, feh-leng diao-kao-go kw'eng-joh-go, tu neng-keo teng Gyi dô-kô weh. ¹¹ Keh-lah yüong dô-kô siang ^[1]en-ŵe, yüong ng-ngô dô-kô dzing-dziu teh-ky'i, ziang ng-lah sô læ-tih tso ka.

⁴ 兄弟，爾拉弗是庵來黑暗裏向個，使得箇個日子像賊介犯着爾拉。⁵ 爾拉都是光明日裏個人。阿拉並弗是夜裏黑暗個人。⁶ 所以阿拉弗該像別人介晒熟；是要甦醒，謹慎。⁷ 晒熟個主顧是夜到晒個；喫醉個主顧是夜到喫個。⁸ 但是阿拉做日裏個人該謹慎；穿上相信等仁愛當護心鏡，還有想望得救個心當鐵帽。⁹ 因為神明弗是設立阿拉受慚惶；是設立阿拉靠着阿拉主耶穌基督好得救。¹⁰ 其是爲了阿拉死，使得阿拉，弗論調覺個晒熟個，都能夠等其大家活。¹¹ 箇拉用大家相安慰^[1]，用爾我大家成就德氣，像爾拉所來的做介。

[1] 'Ôh wô, ky'ün. 或話，勸。（原註）

¹² HYÜONG-DI, keh-sing læ ng-lah cong-nyiang lao-lao-loh-loh, dzæ-ü Cü kwun-li ng-lah kying-kyiæ ng-lah go cü-kwu, ah-lah ts'ing ng-lah yüong nying-djôh gyi, ¹³ ping-ts'ia we-leh gyi sô tso-go z-ken yüong kah-nga æ-sih gyi. Yüong dô-kô siang-'o.

¹² 兄弟，箇星來爾拉中央勞勞碌碌，在於主管理爾拉警戒爾拉個主顧，阿拉請爾拉用認着其，¹³ 並且爲了其所做個事幹用格外愛惜其。用大家相和。

¹⁴ Hyüong-di, ah-lah ^[1]ky'ün ng-lah yüong kying-kyiæ keh-sing ^[2]lön tso z-ken go, en-tah keh-sing tæ-n-ky'iah-go, vu-dzu keh-sing no-ziah-go, kw'un-shü keh-sing cong-nying. ¹⁵ Yüong siao-sing m-nao pô hyüong-ôh ky'i pao nying-kô hyüong-ôh: feh-leng dæ zi-go nying, 'ôh-tsia dæ cong-nying, tu iao z-djông ken-kying ky'i 'ang jün.

¹⁴ 兄弟，阿拉勸^[1]爾拉用警戒箇星亂做事幹個^[2]，安搭箇星膽怯個，扶助箇星懦弱個，寬恕箇星衆人。¹⁵ 用小心嚙得好把兇惡去報人家兇惡。弗論待自個人，或者待衆人，都要時常趕緊去行善。

[1] Yiu-teh fæn, gyiu-k'eng. 有得翻，求懇。（原註）

[2] 'Ôh wô, we-li-go. 或話，違禮個。（原註）

¹⁸ Yüong djông-djông kw'a-lôh: ¹⁷ yüong dziang-t'ong tao-kao: ¹⁸ yiang-yiang z-ken yüong coh-zia *Jing-ming*; ing-we Jing-ming-go ts-i dzæ-ü Kyi-toh Yiæ-su iao ng-lah z-ka.

¹⁶ 用常常快樂。¹⁷ 用長通禱告。¹⁸ 樣樣事幹用祝謝神明；因為神明個旨意在於基督耶穌要爾拉是介。

¹⁹ Feh-k'o p'oh-mih *Sing-Ling*. ²⁰ Feh-k'o miao-z keh-sing sin-cü shih-wô. ²¹ Yüong bin-pih ih-ts'ih-go z-ken; gyi hao-go, iao siu-leh-lao. ²² Yüong li-yün yang-yang ôh z-ken.

¹⁹ 弗可撲滅聖靈。²⁰ 弗可藐視箇星先知說話。²¹ 用辨別一切個事幹；其好個，要收勒牢。²² 用離遠樣樣惡事幹。

²³ Dæn-nyün keh-we bing-en-go Jing-ming s-teh ng-lah djün-djün sing-jün; dæn-nyün ng-go ling-sing teng weh-ling teng kyi-sing tao ah-lah Cü Yiæ-su Kyi-toh læ-go z-'eo djün-djün-be-be pao-lao, m-kao hao p'i-bing. ²⁴ Keh-we dziao ng-lah læ Cü-kwu z sing-jih-go, Gyi pih we tso-dzing.

²³ 但願箇位平安個神明使得爾拉全全聖善；但願爾個靈性等活靈等肌身到阿拉主耶穌基督來個時候全全備備保牢，嘸告好批評。²⁴ 箇位召爾拉來主顧是信實個，其必會做成。

²⁵ Hyüong-di, yüong t'i ah-lah tao-kao. ²⁶ Yüong ts-ts-dzing-dzing 'ang hyüong-cü-go li, mông-mông cong hyüong-di. ²⁷ Ngô t'ôh Cü-go ming-deo ^[1]feng-fu ng-lah hao doh keh-fong sing peh long-tsong sing-jün-go hyüong-di t'ing.

²⁵ 兄弟，用替阿拉禱告。²⁶ 用致致誠誠行嗅嘴個禮，望望衆兄弟。²⁷ 我託主個名頭吩咐^[1]爾拉好讀箇封信撥攏總聖善個兄弟聽。

[1] 'Ôh wô, gyiu-k'eng. 或話，求懇。（原註）

²³ Dæn-nyün ah-lah Cü Yiæ-su Kyi-toh-go eng-we ling-djôh ng-lah. Üô-meng.

²⁸ 但願阿拉主耶穌基督個恩惠臨着爾拉。亞們。